



## Kuzaliwa kwa Kristo Fumbo

### Lisiloeleweka

Bikira atachukua mimba, atazaa mtoto mwanamume, naye atamwita jina lake Imanueli. —Isaya 7:14.

Hatuwezi kuelewa jinsi Kristo alivyoshuka kuwa mtoto mchanga mdogo asiyejiweza. Angeweza kuja duniani katika uzuri kwa namna ambayo hangefanana na mwana wa mtu yeyote. Uso Wake ungeweza kung'aa kwa nuru, na umbo Lake lingeweza kuwa la mtu mrefu na mzuri. Angeweza kuja kwa namna ambayo ingevutia wale ambao wangemtazama; lakini hii haikuwa namna ambayo Mungu alipanga Yeye aje kati ya wanadamu.

Ilimpasa awe kama wale waliokuwa wa familia ya kibinadamu na katika jamii ya Kiyahudi. Mwonekano Wake ulikuwa uwe kama wa wanadamu wengine, na hakuwa awe na uzuri wa mtu kiasi cha kufanya watu waelekeze vidole kwake kama aliye tofauti na wengine. Alikuwa aje kama mmoja wa familia ya wanadamu, na kusimama kama mtu mbele ya mbingu na nchi. Alikuwa aje ili kuchukua nafasi ya mwanadamu, kujiweka rehani maisha Yake kwa niaba ya mwanadamu, na kuonesha kwamba Shetani alikuwa ameongopa alipodai kwamba jamii ya kibinadamu sasa ilikuwa yake milele; na kwamba Mungu asingeweza kuwapokonya watu kutoka mikononi mwake.

Watu kwanza walimwona Kristo kama mtoto mchanga, kama mtoto....

Kadiri tuwazavyo kuhusu Kristo kuwa mtoto mchanga hapa duniani, ndivyo linavyozidi kuonekana kuwa jambo la ajabu. Inawezekanaje kwamba yule mtoto mchanga kwenye hori la Bethlehemu bado ni Mwana wa mtakatifu wa Mungu? Ingawa hatuwezi kuelewa hili, tunaweza kuelewa kwamba Yeye aliyeumba ulimwengu wote, kwa ajili yetu alishuka na kuwa mtoto mchanga asiyejiweza. Ingawa alikuwa juu kuliko malaika yeyote, japo alikuwa mkuu kama Baba kwenye kiti cha enzi cha mbinguni, Yeye alikuja akawa mmoja nasi. Katika Yeye, Mungu na mwanadamu wakawa mmoja, na ni katika ukweli huu, tunapopata matumaini kwa ajili ya jamii iliyoanguka dhambiini. Tunapokuwa tukimtazama Kristo katika mwili, tunamwona Mungu katika ubinadamu, na kuona katika Yeye mng'ao wa utukufu wa Mungu, sura halisi ya Mungu Baba (Selected Messages 3:127, 128).

Katika kutafakari hali ya Mungu kuwa mwanadamu ya Kristo, tunasalia tukiwa tumechanganyikiwa mbele za fumbo lisiloelezeka, kwa namna ambayo akili ya mwanadamu haiwezi kuelewa. Kadiri tunavyoitafakari, ndivyo inavyozidi kushangaza. Ni upana mkubwa kiasi gani kati ya uungu wa Kristo na mtoto mchanga asiyejiweza katika hori la Bethlehemu! Tunawezaje kujua umbali kati ya Mungu mkuu na mtoto asiyejiweza? Licha ya hivyo, Muumba wa ulimwengu wote, Yeye ambaye katika Yeye kulikuwa na ukamilifu wa Uungu katika mwili, alidhihirishwa katika mtoto mchanga asiyejiweza katika hori. Akiwa juu sana kuliko malaika yeyote, akiwa sawa na Baba katika hadhi na utukufu, wakati huo huo akivaa vazi la ubinadamu! Uungu na ubinadamu viliunganika kwa namna ya kustaajibisha, naye mwanadamu na Mungu wakawa mmoja. Ni katika umoja huu ambapo tunapata tumaini la jamii yetu iliyoanguka dhambiini (The Signs of the Times, Julai 30, 1896).